

Liquidar tschienmelli scartiras normadas

Il graficher Remo Caminada ha gudignau il premi federal per design

DAD AUGUSTIN BEELI

■ Igl Uffeci federal da cultura promo-va dapi 85 onns ideas innovativas. Denter auter fa el quei cun ina concurrenza per las differentas spartas dalla grafica. Finamira eis ei che la Svizra sappi tener petg cun autras tiaras. Per siu project da diplom «Type Generator» ha Remo Caminada da Sagogn gudignau il premi federal da design 2007. Karajan valeva sco despot, Van Gogh sco stuorn, Galileo Galilei fuva hereticher e Charles Darwin scuril-curios. Quellas personas han buca giu lev en lur veta, oz valan els sco piuniers e herox en differentas spartas. Cun talas personalitads vules Remo Caminada maina vegnir associatus. El vul esser ni idol ni herox. Quei che animescha da cumparegliar quei um dalla grafica cun personalitads dil vargau ei siu senn per novas vias.

Tuts dano in ein stai skeptics

Igl onn vargau ha Remo Caminada farg la lavur da diplom alla Scola auta per creaziun ed art a Turitg (HGKZ). Igl um da 33 onns ha giu ina finamira ambiziuosa: «Jeu liquideschel tuttas tschienmelli scartiras ufficialas ch'ei dat», ha el getg a sesez. Tgei che quei munta sa mintgina e mintgin che lavura cul computer s'imaginar. Mintga scartira ei definida claramain cun normas, grondezias, grossezias, segns e strehs. Tier la maschina da scriver da pli baul fuva la scartira «Courier» la norma. U ch'ins duvrava la «Courier» ni ch'ins scriveva a maun.

Auter ch'in han tut ses scolasts scurlau il tgau. Els ein stai fetg skeptics dall'idea da destruir las scartiras ufficialas. «Quei menass gie ad in caos», pon els haver getg. Bandischar e liquidar tuttas normas ha pariu suspectus. Il rebel grischun ha tuttina tenui la dira. Duront tschiens uras ha el pavlau il computer cun fuormlas matematicas. Mintgin dils 26 bustabs gronds ei vegnius involvau el



Il creader visual vul far products ch'ei buca standardisai. Leutier s'audan era atgnas scartiras. FOTO A. BEELI

project «Type Generator». Ina manipulaziun vid il bustab «A» ha stuiu formar tut ils auters bustabs.

El mund dalla stampa, dils cudischs e dils feigs sgulonts, dalla reclama ei la scartira igl a ed igl o d'in product. Tier la gasetta La Quotidiana ei la scartira «Garamont» definida. Vid quella norma s'orienteschan lecturas e lecturs. Cun Courier, Boldoni, Times, Helvetica, Futura, Lucida, Univers e mellis autras ei il standard definius. Seigi lu Subaru ni Sugus, Kuoni, Cailler, Knorr ni Playmobil: La reclama ei adina cumbinada cun ina scartira. Quella sa denton mai esser originala, per tgei mintga creader da grafica sa smaccar sil nuv dil computer ed eleger ina dallas scartiras «ufficialas». Far enzatgei unic, far ina «atgna» scartira, ei nunpusseivel.

Remo Caminada ha buca vuliu sur-

schar pli gitg il domini al computer. El ha vuliu modular atgnas scartiras ed esser creativs enstagl da mo smaccar sil nuv. «Il computer sto vegnir dependents digl utilisader, e buca il cuntrari», ei il creader

visual persquadius. Daferton ei il project «Type Generator» renconuschius generalmein, forsa per quei ch'il creader ha retschiert differentas undrientschas persuentier.

L'invenziun dil «Type Generator»

Il fenadur 2006 ha Remo Caminada gudignau il premi da promoziun dalla Scol'aula per creaziun ed art da Turitg HGKZ. Sia lavur da diplom ei il project «Type Generator». Remo Caminada ha inventau ina maschina, respectiv in program da computer, che possibilitescha a creaders grafics da far atgnas scartiras tenor lur basegns. «Quella lavur ha il po-

tenzial da revoluzionar il diever culas scartiras digitalas», annunzia la HGKZ. Pil project «Type Generator» ha Remo Caminada ussa retschiert ina ulteriura distincziun, il premi federal da design 2007 ch'ei dotaus cun ina summa da 20 000 francs. Igl Uffeci federal da cultura organischa dapi 1918 quella concurrenza.